

豫

章

叢

書

第八冊

敘

先生江夏公叔子也公以王家子特用進士知江夏
縣事故人稱江夏公公自舉鄉至成進士當崇禎朝
數上書極論天下事其意必推本二祖以經營創建
規畫措置者爲已備而世任事之臣不能奉行成法
故天下日弊至舉世皆喑而不敢發者公猶極意指
陳其鳳陽城減宗祿法于本支之計獨詳公自爲江
夏增修武昌城計守禦以備無窮之慮又皆未就而
公歿其後寇乃蹂躪入武昌天下事勢日潰而國運
隨之矣當公知江夏公日在官舍而于奇材劍客四

世之志暇則爲詩文以發其藻思故一時賢士于公
父子間莫不想望愛慕懽忻悚異忌識其爲人也逮
公歿世先生第爲公追歷憶遺亡之冊籍尋去江夏
還南昌未數年而丁國艱先生乃變姓名竄家宜都
匿翠微峯凡數歲後得冠石買山居之率妻子躬耕
種茶自活常至江南欲渡淮而返間走一二百里負
茶自賣之其往來省墓落拓孤憤之際率皆有詩歲
時里社羣飲居農牧樵販雜露間與爲歡樂遇人無
賢愚皆禮愛之興至輒聯哦唱和人亦不知其爲江

夏公公子也胡心仲言先成一詩吟甚苦操紙筆忽
忽亡失後予從學冠石先生書杜老短歌行貽余因
跋其後曰吾欲作詩贈子苦老病不耐思先生後亦
絕不爲詩又凡不飲者六閱月而疾作矣先生已歿
其次年余從其子東孫求索先生遺稿百餘篇因得
繕寫嗟夫先生當江夏公時才氣固已傑然其後流
離喪亂三十餘年不自見其志余生晚近歲間始得
承先生之教今遂隔世而徒慨想其平生語言嘻笑
燕會論議商確之間爲不可得至于低徊慕思讀其
遺編爲可悲也昔先子語贊謂先生初至宜都身雜

備保治火藥諸什器先子遇于客邸奇其精悍之色
因數目之後遂爲兄弟交余猶以先生雅善晦藏問
往古成敗論當世之務其風旨殆與龐德公司馬德
操諸人相似後之讀先生詩而論其世者必于余言
有考焉通家友姪李萱拜撰

朱中尉傳

明季天下宗室幾百萬所在暴橫姦散窮困不自賴
爲非恣犯法而南昌宣藩支子孫尤盛崇禎末諸宗
強猾者輒結凶黨數十人各爲羣白晝捉人子弟于
市或剝取人衣或相牽訐訟破人產行人不敢過其
門巷百姓羣相命曰麀神當是時奉國中尉議鵬年
少特以賢名句四方豪傑士多從之游諸麀宗亦畏
之中尉字作霖父統鎮中崇禎丁丑進士知江夏縣
敢言成敗多奇中上將用公爲兵科給事中未除而
歿事及世系在邱維屏所作江夏公傳中中尉幼奇

慧江夏公戒之小字曰蠡七歲出應賓客公同年萬
公元吉嘗與中尉對奕中尉立小杙上揜腕指揮攻
殺旁若無人萬公笑而睨之曰非凡兒也負則沉思
徹夜旦求復得勝乃已江夏旣劇邑號難治又幕無
他客錢賦悉委中尉中尉創立開收出納法別有籍
法主每項各爲首尾必不少那借老胥見之大驚欲
毫髮欺侵不可得中尉時年二十有一江夏公旣卒
于官推官同年生某攝府印與公有怨牒取公在事
時修城費十數萬金籍相對勘而老胥憾公父子盡
匿諸籍大索不可得中尉同公門人邑諸生張若仲

及弟議霖日夜窮思所出入備記合算較原數十數
萬金無少差另冊報老胥及推官見之大驚以爲神
江夏公柩乃得還南昌而中尉自是得嘔血疾數十
年且瘳且作以至于死中尉性豪邁敢大言見天下
將亂專意結客招致方外異人冀他日爲國家用江
夏公命師事太僕段公然海內所推三異人段其一
也段公有異表鬚長委地數寸許以好道術觸神怒
失明與中尉語大愛之更令讀大學衍義諸書求實
用張若仲亦負奇才精擊刺中尉與爲兄弟交得其
技僧辨文道士張還初深沉有大畧中尉皆委心交

之而辨文往爲邊帥拔勇絕倫肌膚如削玉甲申中尉病湖上寇迫不能行辨文縛椅爲筍與同一鄉人昇之人見辨文狀貌奇偉咸怪異而鄉無賴子有妄擬中尉橐中裝者辨文微覺之日將夕挾弓矢爲嬉遊取木樵插百步外射之十發矢盡中諸無賴子大驚皆羅拜請遂爲弟子而中尉更師事新建歐陽先生斌元友南昌彭士望胡以寧樂平王綱福清林全春廣濟舒益其乙酉左良玉謀破九江悉師數十萬南下中尉因九江毛珏帥師任濟世集其地雄武士將用柯陳兵遏左師柯陳相傳爲陳友諒後所居峭

壁廣哀地跨二省會明三百年兵征不服稱悍旅者
也以當事議不合散去九江亦隨破六月金聲桓入
南昌中尉彭士望兩人相與謀曰大亂至矣坐須此
守田宅爲乎立挈妻子走建昌士望三至寧都見寧
都魏禧立談定交遂同中尉往依焉與諸子結廬金
精之翠微峯講易讀史爲易堂凡八九人初中尉與
士望爲親戚各負才不相能中尉訪士于王綱綱曰
子同里彭達生方今俊傑也而外求士乎中尉曰吾
固知之遂傾身交士望士望亦故愛中尉相定交兩
人者交友遂第一及遷寧都士望嘗游四方中尉以

病多家居並督理二家事既日貧中尉曰不力耕不得食也率妻子徙冠石種茶長子楫孫通家子弟任安世任瑞吳正名皆負擔親鋤畚手爬糞土以力作夜則課之讀通鑑學詩間射獵除田豕有自外過冠石者見圃間三四年頭著一幅巾赤腳揮鋤朗朗然歌出金石聲皆竊嘆以爲古圖畫不是過也而中尉酒後亦往往悲歌慷慨見精悍之色近十餘年益隱畏務摧剛爲柔儉朴退讓使終身無所求取於人無怨惡于世雖子弟行以橫非相干者勿與較也晚又好禪嘗素食持經咒尤嚴殺生戒見者以爲老農

老僧不復識爲誰何之人戊午八月復病嘔血死年六十一蓋中尉以戊午生戊午死云死之日士望阻于楚唯魏禧彭任親舉屍入棺含殮焉先是中尉嘗謂士望禧禧之弟禮曰吾衰病無所用于世君輩好爲之

魏禧曰中尉來寧都時年二十有八予與季禮方壯並願爲中尉死也中尉更姓林字確齋所製茶高妙遠近名曰林芥工二王草法詩於杜爲別出人咸推服之然求書者中尉率書古人詩也楫孫負志氣力作病先中尉卒幼子東孫士望女夫也以謹愿稱

朱中尉詩集卷一

明 朱議霽著

五言古

立志

夫人豈無志直是不肯立一立而衆歸如彼天中極

去習

學習不可間俗習不可染去之雖以漸一刀必兩斷

窒欲

香花與文羽徘徊空山時涓涓成江河只此須窒之

懲忿

五嶽方寸間雲天避竦峙懲之亦以難反躬自平地
辨義

苟有自知明就不欲繇義質俟或不然言動貴擬議
勉行

泰山非不高登臨在跬步何爲有兩足終日立岐路
實踐

不知旣深哀已知匪實踐歲月疾如馳何益死言善
固執

擇善必固執頻復卽爲厲厲尙在平復不復道所棄
同內病中作

汝病痛如刺我病熱如火不能相慰憐坐卧無一語

二

因病轉生燥觸處多厲言子無我怒也我無子疾焉

梅萼

寒威不能勝改柯亦尋常所以霜雪裡含英待春光

采石篇

岷水瀉地流磯頭坐鉞鐔衆豪據鞍馬兵戈起江湖
拋馬跳上船未識風濤惡右挈楚人頭左傾吳儂角
吾聞常將軍攬槍一跳躍北風捲地迴邊脰秋葉落
至今太平府不敢下稍徽

寄題鮑又覲一粟軒

卷石足華岑芥子納須彌心膽不盈握當軒出虹霓
我聞有鮑子結屋水之湄一粟以名軒令我靜言違
龜角僅容足隻眼一離離水欲炤吳楚峯還指海陲
客來車上宿起舞踏青帷那顧壺口缺無問擊筑悲
直使青冥破逼臍中夜時老杜嘆萬間還爲後世嗤

自題小像

擬作看雲圖畫師寫作水策杖立高峯滔滔有如是
春日山中懷周伯恒憲使

平林春鳩鳴茶人聞曙戒植杖循青畦霄晴滌餘蕚

俯仰極天泉所思竟誰在感公推至心生平無殊快
旁語及家事久隱苦窮隘古有蘇雲卿食圃子不貸
更語及神仙低徊若深嘸古有許旌陽忠孝垂當代
仲君抱奇質叶藥起沉痾浩然鸞鶴情遂欲遊方外
吁嗟世風下黃虞邈難逮謾松崖吹彷彿留清籟

谷中九九詩 選五十六首

居高望塗徑東西任所之獨不由其路險阻生平夷
日夕落微泉山塘漸次足七月雨盈澗寧不知其速
夜深鼠窺人火滅爭餘粒我欲攜貓來爾黠亦何益
石壁日苦仄猴緣如平地則飛則滑者性各從其類